

Design
mode...

বাঁচানো যাচ্ছে না ফেনীর নদ-নদীগুলো। এতদিন ফেনীবাসী জানতো ফেনীর দাগনভূঞার একটি অংশে ছোট ফেনী নদী বিলীনের পথে। এবছর দেখা যাচ্ছে ফেনীর ফুলগাজীর মুহুরি নদী ও সিলোনিয়া নদীও রয়েছে বিলীনের পথে। ভারতের উজান থেকে পানি না আসায় ও বেশ কয়েকদিন বৃষ্টিপাত না হওয়ায় পানিশূন্য হয়ে পড়েছে মুহুরি ও সিলোনিয়া নদী।

ইতিমধ্যে নদীর বেশ কিছু অংশ মরুভূমিতে পরিণত হয়েছে। অপরদিকে সিলোনিয়া নদীর ফুলগাজী উপজেলার বন্দুয়া ব্রিজ অংশের পূর্ব-পশ্চিম পাশে দেড় কিলোমিটার পর্যন্ত ছাড়া বাকি অংশে পানি নেই। নদীর গভীরতা কমে যাওয়া এবং খনন না হওয়ার কারণে নদীর পানি ভূগর্ভে যেতে পারছে না।

এতে বেশ কয়েকটি গ্রামের কৃষক বোরো ধান নিয়ে বিপাকে পড়েছে।

এদিকে সিলোনিয়া নদীর পানি শুকিয়ে যাওয়ায় দুই পাশে নিলক্ষী, গোসাইপুর, করইয়া, শ্রীবউরা, নোয়াপুর, কামাল্লা, রাজেশপুর, মনতলা, গাবতলা, মান্দারপুর ও পৈথারা গ্রামের হাজারো কৃষকরা বোরো ধান নিয়ে দুশ্চিন্তায় পড়েছেন। পানির অভাবে মাঠে ধান শুকিয়ে চিটা হয়ে গেছে।

এছাড়া নদীতে পানি না থাকায় এই জেলার মৎস্যজীবীরাও চরম সংকটে পড়েছেন। দেশি প্রজাতির মাছের স্বাদ বঞ্চিত হচ্ছেন স্থানীয়রা।

স্থানীয়রা জানান, নদীগুলো মরা খালের মতো হয়ে যাওয়ায় বর্ষাকালে সামান্য বৃষ্টিতেই নদীর পানি উপচে আশপাশের এলাকায় বন্যা পরিস্থিতির সৃষ্টি করে। আর খরা মৌসুমে এসব নদীর পানি দিয়ে আগে যেসব জমি চাষ হতো, সেসব জমি এখন সেচ সংকটে পড়েছে। এ অবস্থায় সবচেয়ে বিপাকে পড়েছেন কৃষিজীবী ও মৎস্যজীবীরা।

Design
mode...